

567.4
869
:2

續增河東鹽法備覽

卷中

續增河東鹽法備覽分目卷中

奏疏

潞鹽試銷太汾疏

張之洞

鄂爾多斯旗花馬池鹽准運至皇甫川爲止仍不准

水運積口院咨

張之洞

陝岸鹽釐由晉包納疏

張之洞

遵提河東鹽務公費以濟餉需疏

奎斌

潞鹽捐輸備充海防經費疏

奎斌

勸辦河東鹽商捐輸次第委解疏

劉瑞祺

河東鹽務礙難加價另籌商捐銀兩部議

豫省餉源枯竭酌收鹽斤加價部議

歷年提存公費銀兩湊解甘餉部議

坐運各商報効息銀疏

胡聘之

晉陝鹽斤另籌加價部議

畦地因雨被淹酌借款項修復疏

胡聘之

陝省潞鹽加價部議

工程官運兩項提充公用疏

何樞

起徵按引攤捐疏

何樞

行豫潞鹽續議加價減半徵收部議

本省引地改爲官民並運部議

戶部奏新定大案賠款分派攤還疏

陝岸鹽釐遵照部議自行設局加抽疏

李有芬

晉省潞鹽陝豫兩省加價已重未敢再加懇飭勻撥

部議

陝岸鹽釐暫歸晉省徵用以紓商力會疏

趙爾巽

賠款加價統按每名折收銀四十兩疏

吳廷斌

報効練兵處常年的款疏

張曾敷

蘆鹽告運太汾查明窒礙八端院咨 恩 壽

陝省開辦鐵路加抽鹽價有礙潞綱疏

恩 壽

陝省加抽鹽價有礙潞綱再疏 恩 壽

孔子升祀典禮部議

清單摘附

會奏陝省鐵路停收加價疏

曹鴻勳

文廟工程部議

蘆花各鹽越境行銷按斤加釐院咨 寶 棻

河南鐵路加價疏

林紹年

度支部奏酌加鹽價抵補藥稅疏

山東增加鹽價他省不得援以爲例疏

王履康

洛潼鐵路加價每斤三文部咨

吉鹽水運磧口有礙潞綱未便准行院批

寶 棻

潞鹽試銷太汾疏

光緒九年
巡撫兼鹽政 張之洞

再河東鹽務積累滯引太多課虧餉絀催西餉則文
移火急責奏銷則部限森嚴推究本省潞引不銷之
故則由於蒙鹽違例水運侵灌潞綱延及平陽潞澤
等府霍陽等州不復知有違禁越界之事經臣申明
定例嚴飭沿河官吏咨會陝甘兩省曉諭商販令其
照例水運至皇甫川爲止查定例蒙鹽陸運至晉者
止准由殺虎口入邊今查殺虎一路程途稍覺紆回
運銷蒙鹽既有益於商販亦有裨於外藩因擬酌量

從寬如有陸運入晉者除殺虎口外准其由皇甫川對岸之河曲縣渡河登岸陸運至向銷蒙鹽之口內外三十四廳州縣地面行銷其向行土鹽引之陽曲等三十州縣亦准照舊兼銷不准任意再由皇甫川下駛惟太汾兩府爲晉省南北適中之地又爲蒙潞各鹽接界之區該兩府本係例定土鹽引地因土鹽味劣產少民食每多不敷嘉慶十七年部議責令潞商承辦吉鹽六十四廳州縣引岸而潞商不願兼辦是以當時權宜辦法聽其兼食蒙鹽體察今日情形

若僅聽蒙鹽兼銷而不兼銷潞引必不能杜蒙私南路之侵灌而護潞岸切近之藩籬且查吉蘭泰引課六萬三千五百餘兩先係潞商代完以後改歸全綱攤認是吉池銷無課之鹽潞綱賠無鹽之課事理不平莫此爲甚况充斥潞岸之蒙鹽多倫諾爾蘇尼特烏珠穆沁浩齊特花馬池各處所產皆有更非獨舊引有名之吉蘭泰一種而已也因飭河東道酌提潞綱積引配鹽轉運分赴汾州府屬之汾陽平遙介休孝義太原府屬之陽曲太原徐溝文水榆次太谷祁

縣等十一縣試辦行銷以輔土鹽蒙鹽之不足價值
務令減於蒙鹽至土鹽仍聽民淋曬蒙鹽仍聽民運
售民間願食何鹽悉聽其便不准絲毫抑勒據護理
河東道黃照臨體察籌議稟請試辦前來除飭委本
任河東道高崇基督辦省城總運局該護道督辦河
東發運局會同籌辦外理合附片具陳十二月初一
日奉

旨戶部知道欽此

鄂爾多斯旗花馬池鹽准運至皇甫川爲止仍不准

水運磧口院咨

光緒九年
巡撫兼鹽政 張之洞

案准陝甘督部堂譚咨開據陝西延榆綏道張岳年稟稱案據神府鹽釐分局委員王丞南薰夾單稟稱現接通秦寨書士王文銘探得晉屬之磧口堡鹽捕廳出示嚴禁不准蒙鹽渡河鈔錄告示二紙稟報前來卑職細閱情形係奉晉撫院檄飭之件商販等自不敢抗違致蹈其咎惟查卑局所過之鹽專銷晉省而磧口爲多忽奉嚴禁自不敢壅於上聞等情據此

職道遵查運鹽銷售各有引地自不容攙越侵占致妨引課此定制也陝甘邊界各旗蒙鹽多由花定馱載例准銷至陝西鳳邠所屬爲止鳳邠以南則與行銷潞鹽引境接壤前奉行知已由晉撫飭在宜洛長武關隘分作三路實力巡緝堵截並令分飭花馬池鹽屬官吏嚴諭花鹽運販照例運至鳳邠所屬界內售賣不得任意闌入潞鹽引地侵占正課如違照律懲辦等因遵奉轉行照辦在案茲據王丞探得晉屬磧口鹽捕廳接奉山西撫憲飭禁明文兩次出示不

准蒙鹽渡河自爲恐侵占潞鹽引地照章辦理惟該
磧口通判告示內稱查花鹽暨附近各旗蒙鹽係於
嘉慶十七年欽奉

諭旨向准窮民馱載肩挑背負由殺虎口陸路運至食土鹽
地方行銷等語是此等零星馱載負販蒙鹽原不在
禁令之列該通判初次告示尾稱因附近各村居民
熬食土鹽恐有缺乏責令鄉地商賈會議轉詳撫憲
酌留渡河鹽數似於民食關心深明大義迨閱該通
判二次告示復有不准蒙鹽顆粒渡河之語似又未

能因地制宜自相矛盾現在事同創始該商販等祇知漁利罔顧例禁或有阻撓違抗亦未可定若概繩以法律操之過蹙難免激成事端除飭行神府二縣會同分局王丞移關磧口周通判查明從前奏定章程合籌妥議曉以利弊務使該處商販力挽積習各守各界毋再潛越偷販有干罪戾仍由該印委等詳細籌議章程送道至日再由職道察核議稟外所有接據探查磧口禁阻水運私販竟有不准蒙鹽顆粒赴晉行銷之示緣由理合將鈔來示稿兩道飭承照

錄一分恭呈電鑒可否移咨山西撫院飭令磧口通判遵章妥辦仍將馱載肩挑零星負販蒙鹽照舊由陸行銷但不准違例水運私售以期陝晉商民相安無事之處敬候核示遵行等情到本督部堂據此除批示候咨山西撫院查覆仰卽知照外相應咨會請煩飭議見覆施行等因准此查河東鹺務積疲年甚一年引滯課懸西餉竭蹶奏銷緊迫部議森嚴自蒙鹽內灌而全綱始壞自磧口弛禁而來鹽益多其初不過蔓延汾介一帶繼乃漸灌漸南到處暢銷直達

澤潞至今日而官課日絀逋積日多不得不於橫流
潰決之秋爲亡羊補牢之計除據河東道議稟將積
年陳引先於太汾兩府試銷外當經嚴飭署理磧口
通判周桂敷總查沿河各口重申功令專緝永甯州
磧口臨縣馬家塔子等處水運對渡蒙私另於河曲
縣暨薩拉齊廳之包頭鎮設立專卡抽收釐金又於
保德州之天橋村興縣之羅峪口派員前往專管查
緝水運對渡蒙私拏獲照例懲辦均經先後飭辦各
在案因查蒙鹽之來晉銷售者一爲阿拉善旗之吉

蘭泰池鹽一爲鄂爾多斯旗之花馬池鹽溯自嘉慶十七年

欽差侍郎阮元等奏定吉鹽章程一案吉蘭泰引額八萬七千五百道歲徵課銀六萬三千五百八十餘兩自嘉慶十八年始議由河東商人認辦其吉鹽引地六十四廳州縣概歸潞商一體行鹽並照長蘆之例定爲餘引吉蘭泰鹽池聽該處民人自行撈運有興販入口者照鄂爾多斯蘇尼特鹽之例由山西巡撫照章收稅止准車載騾馱由陸路運販不准水運所有